



Letsatsi la go Bala ka go Hlaboša Lentšu la Lefase

le Nalibali




Eba karolo ya bakgathatema ba diketekete ge re tla be re balela godimo kanegelo ya go ikgetha go bana ba bantši ka mo go ka kgonegago Letsatšing le la Boditšhaba la go Balela Godimo, ka 7 February 2024 – le letsatsi le lengwe le le lengwe – gomme o be . . . karolo ya Afrika Borwa ya go aga go ithuta go bala! Kanegelo ya rena e kgethegilego ya *Nkatsana ya go timela*, e ngwadilwe ke Stacey Fru gomme diswantšho di terowilwe ke Rico. Kanegelo ye e hwetšagala ka maleme a 11 a Afrika Borwa. Kanegelo ye o ka e balela godimo bana ba mengwaga e 6 goba go feta moo. Bakeng sa bana ba banyenyane, šomiša karata ya rena ya kanegelo ya Mengwaga ya Mathomong ya Letsatsi la go Bala ka go Hlaboša Lentšu la Lefase.



Itokišetše go bala kanegelo ka go hlaboša

- 🐾 Itlwaetše kanegelo ye gabotse gore o tle o kgone go e anega goba go e bala ka go hlaboša ka tsela ya gago.
- 🐾 Nagana gore o tlo phediša bjang kanegelo yeo. Kgetha gore ke ponagalo ya mohuta mang ya sefahlego le boitšhišinyo bja mmele tše o nyakago go di diriša.
- 🐾 Kgetha nako mo letsatšing moo o ka abelanago kanegelo le . . . lapa la gago le feletše.
- 🐾 Hwetša dikarolo tša kanegelo tšeo go tšona bana ba ka tšeago karolo go tšona, ka mohlala, ba ka lla ka tsela yeo nkatsana le mpša di llago ka yona.
- 🐾 Itlwaetše go anega kanegelo goba go e bala ka go hlaboša.



Pele o bala kanegelo ka go hlaboša

- 🐾 Bala sehlogo sa kanegelo. Botšiša bana ba gago gore ba nagana gore kanegelo e bolela ka eng.
- 🐾 Ba botšiše dipotšišo tše di tla ba thušago go kwešiša dikgopolo le maikwelo tša baanegwa ba kanegelong.

Dikgopolo tše le ka bolelago ka tšona: Naa wena goba motho yo o mo tsebago o na le seruiwa? O be o tla ikwa bjang ge seruiwa seo se ka timela? O be o tla dira eng go leka go hwetša seruiwa seo? O be o tla ikwa bjang ge o ka se hwetša?

Ge o dutše o bala kanegelo ka go hlaboša

- 🐾 Ge o dutše o bala kanegelo, botšiša bana ba gago dipotšišo ka kanegelo yeo. Potšišo ya gore, “Le nagana gore go tlo direga eng ka morago?” e bohlokwa kudu ka gore e thuša bana go ithuta go bonela dilo pele, e lego bokgoni bjo bohlokwa mogatong wa go ithuta go bala le go ngwala.
- 🐾 Ba kgopele gore ba go ekišetše ge o dira medumo ya diphoofolo.



Ikaneng gore le tla balela godimo le le lapa **Letsatšing le la go Bala ka go Hlaboša Lentšu la Lefase** – le letsatsi le lengwe le le lengwe. Ingwadiše go www.nalibali.org goba romela lentšu “WRAD” ka WhatsApp go **0600 44 22 54**. Lapa le lengwe le le lengwe leo le ingwadišago le tla ba le sebaka sa go tsenela **leeto la lapa la go bala ka Letsatsi la Nalibali la go Bala ka go Hlaboša Lentšu la Lefase**. O tla hwetša dikanegele tše dingwe go akaretša le maele le dikeletšo tša kamoo o ka balago le ngwana wa gago ngwaga ka moka.

Nkatsana ya go timela

Kanegelo ka Stacey Fru ☺ Diswantšho ka Rico

Ka Labohlano thapama, Neo le Bella ba be ba raloka ka serapeng sa gabo Neo. Noodle o be a robetše ka khutšo letšatšing.



Ka ponyo ya leihlo, Noodle o ile a tsoga ka go akgofa gomme a thoma go goba. *Hou, hou, hou!*

“Molato ke’ng Noodle?” gwa botšiša Bella.

Ke moka ba ile ba kwa lešatanyana le etšwa sethokgwaneng. *Miao, miao, miao!* Nkatsana e tsothwana e ile ya tšwa ka gare ga sethokgwana seo. Bella o ile a e kitimela ke moka a e kuka ka lerato. “Bona sefahlegwana sa yona se sebotsana sa boya,” a realo a bontšha Neo.

“E bile e na le lephantana le lebotsana le letalalerata mo molaleng,” gwa realo Neo.

Noodle le yona e be e nyaka go bona, eupša go goba ga yona go ile gwa tšhoša nkatsana, ka gona Neo le Bella ba ile ba tseno le yona ka ntlong.



“Mma, Tate, bonang!” Re hweditše nkatsana ka kua serapeng!” gwa goeletša Neo ba dutše ba kitimela ka phapošing ya bodulo.

“Re nagana gore e timetše, eupša e swanetše go ba e le ya mothotsoko ka gore e na le lephantana le le talalerata mo molaleng,” gwa realo Bella.

Tate o ile a tloša mahlo pukung ye a bego a e balela Mbali, ke moka a re, “Re swanetše go leka go hwetša beng ba yona. Ba swanetše go ba ba tshwenyegile kudu gore ba timeletšwe ke nkatsana ya bona.”



“E šetše e le bošego gore re ka ba tsoma,” gwa realo Mma. “Eupša gosasa mesong, re ka dira diphoustara tša nkatsana ye gomme ra di phara gohle gore batho ba di bone. Mohlomongwe mong wa yona o tla bona diphoustara tšeo.”

Ge Mma a felegetša Bella le Noodle gae, Neo o ile a hwetša lepokisi la dieta le jeresi ya kgale gore a direle nkatsana malao a borutho. Tate o ile a e nea dijo le meetse a go hlweka ka sekotlelo se segolo. E se kgale ke ge nkatsana e khoše gomme e ile ka boroko.



Mesong ya Mokibelo, Bella o ile a fihla e sa le ka masa. “Ke rekile pampiri le dikherayone gore re dire diphoustara,” gwa realo Bella a dutše a gokarela nkatsana.

“A re thomeng!” gwa realo Neo.

Ge ba dirile diphoustara tše nne, Tate o ile a re, “Ke nagana gore di lekane. A re yo di pharang.”

Ba ile ba thoma ka go ya bokgobapukung, ka morago ba ya lebenkeleng, ke moka ge ba boela gae moagišani a ba dumelela go bea phoustara e nngwe keiting ya gagwe. Ba ile ba šala ka phoustara e tee, gomme ba e phara letlapeng la ditsebišo la sekolong ka Mošupologo.



Ka Labobedi thapama, Neo, Bella, Noodle le nkatsana ba be ba raloka ka phapošing ya bodulo. *Ko, ko, ko, ko!* Go be go na le motho yo a kokotago mojakong.

Neo o ile a kitima gore a yo bula mojako.

“Neo, ke mang?” gwa botšiša Bella.

Noodle o ile a goba ka lethabo.

Lešata leo le ile ka tšhoša nkatsana moo e ilego ya tšhaba gomme ya utama ka fase ga sofa.

“Eh, dumela,” gwa realo Neo ge a bona ngwanenyana yo a sa mo tsebego a eme mojakong.

“Dumela, ke nna Gina,” gwa realo ngwanenyana. O be a bonala a tshwenyegile. “Ke bone phoustara ya lena kua bokgobapukung. Ke nagana gore nkatsana ye le e hweditšego e ka ba e le ya ka. Leina la yona ke Ginger gomme e na le lepantana le le talalerata mo molaleng.”



Pelo ya Bella e ile ya kwa bohloko. O be a nyaka gore nkatsana yeo e be ya gagwe, le ge a be a tseba gore Gina ga a robale ka ge nkatsana ya gagwe e timetše. “Tsena,” gwa realo Bella.

Ge ba tsena ka phapošing ya bodulo, nkatsana e be e se gona. “Tjooo!” gwa realo Bella. “Ke holofela gore nkatsana ga se ya timela gape!”

Neo, Bella le Gina ba ile ba e tsoma gohle ka phapošing ya bodulo, eupša ba se e hwetše. Gina o be a bonala a nyamile kudu.

Ke moka ba ile ba kwa Noodle ka khitšhing. *Hou, hou, hou!* Gwa latela lešata le legolo la gore *TŠHWAA!*

Bana bao ba ile ba kitimela ka khitšhing. Ba ile ba hwetša nkatsana e ituletše fase. E be e tšholotše meetse a yona a ka sekotelong se segolo ge Noodle a be a goba. Gabjale nkatsana e be e thapile kudu.



Bella o ile a e kuka gomme a e phumola kapela. Ke moka o ile a e nea Gina. *Phurr, phurr, phurr.* Nkatsana e be e thabile kudu!

“Ginger! Ke be ke go hlogetše,” gwa realo Gina a gokarela nkatsana ya gagwe. Gina le yena o be a thabile kudu. “Bella, le wena Neo, ke leboga go ntlhokomelela nkatsana ya ka.”

“Ke leboga gore o hweditše nkatsana ya gago,” gwa realo Bella. “Eupša ke nyamišwa ke gore re ka se sa bona Ginger gape.”

Neo o ile a khabara Bella mo legetleng. O be a bona gore o nyaka go lla.

“Eh, o se ke wa tshwenyega!” gwa realo Gina. “Re dula kgauswi le kgauswi. O ka etela Ginger ka nako efe goba efe ge o rata.”

Bella o ile a thoma go thaba, ke moka a re, “Ke a leboga! Nna le Neo re ka rata go go etela gosasa thapama.”

Neo a re, “Eupša, ke nagana gore Noodle o swanetše go šala gae.” Ka moka ga bona ba ile ba dumelelana ka gore yeo ke kgopolo e botse kudu.



Ka morago ga go bala kanegelo mmogo, boledišanang ka se se diragetšego kanegelong. Botšiša dipotšišo tša go hlohleletša bana ba gago go nagana le go bolela dikgopolo tša go tsamaišana le kanegelo, ka mohlala o ka re, “O rata karolo efe mo kanegelong?” Ge e ba o na le bana ba bagolwanyane, ba kgothaletše go ithuta ka mo go oketšegilego ka mehuta ya diruiwa le kamoo ba ka di hlokomelago ka gona.

Dira gore kanegelo e be le bophelo!

- 🐾 Terowa seswantšho sa karolo ye o e ratago kudu kanegelong.
- 🐾 Leka go diragatša kanegelo ye goba karolo ya yona o na le bagwera ba gago le ba lapa. Le ka ba la dira gore yo mongwe wa lena a itire okare ke Ginger le Noodle. Dirišang mebele ya lena, maletere le mantšu gore kanegelo e thabiše!
- 🐾 Dira phoustara ya seruiwa sa gago goba ya seruiwa se o ka ratago go ba le sona. Terowa seswantšho sa seruiwa seo. Ngwala goba o kgopele motho yo mongwe go go thuša go ngwala bogolo bja seruiwa sa gago, mmala wa sona le leina la sona.



Abelana ka dinepe le dibidio tša ge wena le bana ba gago le ipshina ka kanegelo le mešongwana ya Letšatši la go Bala ka go Hlaboša Lentšu la Lefase [#nalibaliwrad2024](#) go mafarahlahla a rena a dipoledišano!

TheNalibaliChannel

nalibaliSA

@nalibaliSA

@nalibalisa

@nalibalisa

nalibalisa

The Nal'ibali Trust

+27 64 801 5496

Nal'ibali (ka se-Xhosa e ra gore "kanegelo ke ye") ke lesolo la boditšhaba la go ipshina ka go bala. Re nyaka go ba le Afrika Borwa yeo go yona bana ka moka ba ipshinago ka kanegelo tšatši ka tšatši.



GO THOMA KA
KANEVELO.

Sepedi